

HSET HÊBRU

Jesus yeo haqnhèq ka bình plình

¹ Calah nèh, Boc Plình khoe yǒc bài pajàu òòeq hu hnài bài boc yaq bèn bǎc yàng bǎc trong,

² khoe aih trùh ta bài hi atìq kô, haq hnài bèn xi kon cla haq, aih Kon, haq ma khoe dèch paqnàng hujah dǒng rìm yiniq, èh hadai ajang Kon aih raq haq ma khoe broq loh Plình crǒng taneh;

³ Kon aih la kan qngah qngai da Boc Plình, aih raq radua qmù da haq, yǒc bàu i cwàng itai haq òòeq dèch paqnhrang rìm yiniq, jò Kon khoe broq hreo dǒng yiniq lui, jah haqngui enh qma Boc Plình, oe tanòe òiq jah haqnhèq,

⁴ qmang aih yiniq haq jah yi haqnhèq dǒng ka yiniq bình plình dàng leq aih èh haq jah yeo haqnhèq dǒng ka wì dàng aih òiq.

⁵ Majah qmang aih Boc Plình alah doe ka bình plình leq rameh:

“Ìh kô Kon au,

Hì kô au khoe ha-uang qnoh ìh?

Alah i jò leq Haq doe:

“Kô èh au broq baq ìh,

Ìh broq kon au”?

⁶ Mahaq jò Boc Plình qmùt dèh Kon ramua ta crǒng taneh, aih haq doe rameh:

“Òiq dǒng bình plình da Boc Plình ep kùh waiq Kon”.

⁷ Ràu trùh bình plình haq doe:

“Boc Plình broq ka bình plình da haq tiah ka cayeo,
Broq ka hapǝng da haq tiah ka pla ùnh”.

⁸ Mahaq anoe trùh deh Kon, haq doe:

“Boc Plình ôi, gèq bùa da Ìh oe yôt enh qnhòng
kô trùh qnhòng tau,

Cwìang diac da Ìh aih cwìang da kan taq atoq.

⁹ Ìh enh trong taq atoq, git trong dù;

Aih iq, Chuaq ôi, Boc Plình da Ìh yǝc dầu lem bùi
xùt ka Ìh,

Broq ka Ìh yeo qnhèq dǝng ka bua Ìh.

¹⁰ Boc Plình doe hòh:

“Chuaq ôi, adroe dìq dǝng Ìh khoe broq xèm taneh,
Trǝc hadai loh enh tì kǝng Ìh.

¹¹ Plình crǝng taneh èh raliang lùch, mahaq Ìh
oe yôt;

Plình crǝng taneh èh kùn tiah ka ahyah eo;

¹² Ìh canua haq bu dǝng blah eo yôh,

Khoe aih plình crǝng taneh hi tablòq,

Mahaq Ìh dua mòeq jaq,

Bài hanam da Ìh ùh lùch.

¹³ Boc Plình alah doe ka bình plình leq rameh:

“Haqngui enh qma ka au,

Trùh jò au roh bài mangai ma tagit broq radua
enh qneq ka jèh ìh?

¹⁴ Dìq ka bình plình aih ma ùh xài bài yiang
patìh ka Boc Plình, khoe jah thê loh ta crǝng taneh
đòeq patìh ka bài mangai ma padon jah kan dèch
qmòh?

2

¹ Qmang aih, kiang bèn ep wèq ka cajap trong bèn khoe jah tàng, dôq ùh hĩaq hùu đac taqnoeq.

² Majah qmang aih, tàng joq bàu da bình plình anoe aih khoe cajap cajinh, cabô ùh iu ùh tiaq bàu aih khoe jah hnoq kan patem qmòe amat,

³ tàng bèn toq patrò kan dèch kàn kaiq qmang aih, broq qmang leq bèn ma claih? kan dèch kô Chuaq anoe qnoh adroe, i mangai ma tàng, anoe panhìn hlài ka nhèn.

⁴ Boc Plình hadai yóc bàc trong bàc kan halac, yóc kan tabàih dech enh Yiang Hadròeh axong tiaq manoh cla haq enh, òeq hu panhìn ka wì aih.

IISa 2Sm 7:14 Thi Tv 104:4 Thi Tv 45:6, 7 Thi Tv 102:25-27

Jesus broq rađeh wìa kon mangai

⁵ Qmang aih, crõng taneh ma padon trùh nhèn ma qnang anoe kô, Boc Plình ùh òeq haq oe enh qneq ka cwiang bình plình.

⁶ Mahaq i ngai khoe doe rameh:

“Kon mangai kô ìq cleq, Chuaq ma hmàng trùh?

Kon mangai kô ìq cabô, Chuaq ma palàng?

⁷ Chuaq khoe òeq haq yi qneq ka bình plình toq biaq,

Pa kui am ka haq kui cadoh plình ranhòm lem

⁸ Chuaq roh òeq rìm yiniq enh qneq ka jènh haq”.

Boc Plình broq ka rìm yiniq òeq ep oe enh qneq ka Chuaq Jesus, qmang aih dôq ùh i mòeq cleq ùh iu haq, yàng manòeq kô bèn qnhòq hnoq rìm yiniq òeq iu haq.

⁹ Mahaq Chuaq Jesus kô, ma khoe oe qneq ka bình plình toq biaoq, bèn hnoq haq manòeq kô khoe jah pacui cadoh diac plình lem ranhòm, pàng haq khoe chiùq cachit. Qmang aih, taiq kan tabàih da Boc plình, Chuaq Jesus majah khoe cachit am rìm ngai.

¹⁰ Joq Boc plình la mangai ma rìm yiniq ngeà diq ta haq rai canòm ka haq, pàng enh aràng bác ngai kon trùh ta kan qngah qngai, aih haq broq joq khoe troq jò haq broq ka Chuaq Jesus aih xem kan dèch da wì kon aih, jah gèh geo ajang kan chiùq xalep.

¹¹ Qmang aih, Mangai ma broq ka hadròeh xam mangai jah hadròeh, aih diq loh enh mòeq Baq raq. Aih iq, Chuaq Jesus majah ùh camaih ka creo ka wì aih oh daq,

¹² jò Haq doe:

“Au jah anoe yiniq Ìh ka oh daq au,
Oe taqne Tagop au calêu manè Ìh”.

¹³ Haq doe hòim: “Au hataq rađeh ka Chuaq. Èh hòim:

“Kô au xam bài kon Boc Plình ma khoe am ka au”

¹⁴ Qmang aih, taiq wì kon i xech i mahim dài cla Chuaq Jesus majah hadai waq ka i qmang aih diq, ðòeq jò cachit, haq jah raliang đac mangai ma wèq cwàng kan cachit aih Satan,

¹⁵ rai paclaih am ka rìm ngai taiq crè ka kan cachit dài majah ep broq đeh hapông lùch ka qnhòng.

¹⁶ Joq qnàng, haq trùh ùh xài ðòeq hu wiang ka bài bình plình, mahaq ðòeq hu wiang ka nang noe da Apraham,

¹⁷ Aih iq, dài rìm trong haq majah ep broq tiah dèh ka oh daq, òeq enh nèa Boc Plình jah wia Pajàu haqnèq, loq ha-och, ùh tablòq manoh, òeq cachit ka yiniq lui da kon mangai.

¹⁸ Pàng cla haq khoe chiùq nanxa ta kan padô qnùt, dài haq majah i cwiang dèch bài mangai jò wì glàm kan padô qnùt.

3

Jesus yeo haqnèq ka Moise.

¹ Qmang aih, ôi oh daq hadròeh, aih bài mangai hadai jah bàu creò enh plình, drah hèm trùh Mangai wê bàu, Mangai pajàu haqnèq bèn ma khoe lui tiaq, aih Chuaq Jesus.

² Haq ùh tablòq manoh dèh ka Mangai ma thê haq, tiah ka Môise ùh tablòq manoh ka hnim Chuaq.

³ Majah qmang aih, Chuaq Jesus khoe jah ranhòm jah haqnèq ùh hnau ka Môise, tiah ka mangai broq hnim ranhòm ùh hnau ka chac hnim.

⁴ Majah qmang aih, rìm toq hnim diq i mangai broq loh; mahaq Mangai ma broq loh rìm yiniq aih Boc Plình.

⁵ Môise, haq ùh tablòq manoh ta hnim Chuaq tiah ka mangai hapõng khoe jah creò òeq hu panhìn ka bài bàu Boc Plình ma anoe ta hì atiq kô èh.

⁶ Mahaq Christ aih ùh tablòq manoh qmang ka cla kon calô wèq cwiang ta hnim Boc plình; yàng aih bèn kô raq hnim Boc plình, waq toq bèn cajap manoh lui xam kan canòm trùh lùch, yõc biac aih raq broq deh kan ranhòm ka bèn.

⁷ Aih iq, qmang ka Yiang Hadròeh i doe:
“Hì kô tàng pì tàng bàu haq,

⁸ Aih apaq cadoq manoh qmang ka pì khoe
broq jò àu yòng tablêq ka haq,
Aih hì pì ma qnhro Boc Plình tanoè braih kàn.

⁹ Aih nòe boc yaq pì khoe hnoq yiniq au broq
ta pôn jàt hanam,
Mahaq dua oe raq enh ti qnhro ngan au!

¹⁰ Qmang aih, Au majah nòeh ka nang noe aih,
Au doe: Manoh da wì haq toq lam lìq,
Qnhòq lah qnì ka trong da au.

¹¹ Kô bàu au hapah ta kan panòeh: wì haq blình
ùh jah mùt ta kan padài da au”.

¹² Oh daq rabiaq oq, òe qne oh daq ùh hìaq
mangai leq i manoh dù rai ùh lùì, loh qmòe ka
cađac Boc Plình halình qmòh.

¹³ Mahaq rìm hì ep ti pariaq dabau, jò ma oe raq
jah creò: “Hì kô” òe q diq dõng oh daq ùh hìaq
i mangai leq cađac yiniq lui padô rađeh loh ka
cadoq manoh.

¹⁴ Majah qmang aih, bèn khoe wiang jah pajùm
ti Christ, waq toq bèn wèq deh manoh lùì enh jò
baxèm cajap trùh lùch,

¹⁵ jò oe raq doe:

“Hì kô tàng pì tàng bàu haq,
apaq cadoq manoh,
Qmang ka pì khoe broq,
jò àu yòng talêq ka haq”.

¹⁶ Qmang aih, cabô tàng bàu haq khoe èh hì àu
yòng tablêq hlài, aih ma ùh xài bài mangai ma
canòm ka Môise qnung wì haq loh enh gùng Êjip
qmòh?

17 Boc Plình khoe panòeh ka cabô ta pôn jàt hanam aih? Ajoq nòeh ka bài mangai ma broq yiniq lui, hanang wì haq ma khoe tacro ta nòe braih kàn qmòh?

18 Haq hapah ka cabô jò ma doe: Blinh wì ùh jah mùt tanòe padài da haq? Ajoq ka bài mangai ma ùh iu bàu?

19 Qmang aih, bèn hnoq dài wì aih ma ùh jah mùt, aih taiq wì haq ùh lùì.

4

Kan padài da Boc Plình têu am ka mangai lùì

1 Qmang aih, qnang jò oe raq i bàu têu am jah mùt ta kan padài da Chuaq, bèn drah loq crè, tabeq loq i mangai leq taqne oh daq loq ùh jah mùt qmòh.

2 Majah qmang aih Bàu lem kô khoe jah anoe am ka bèn hadai tiah qmang ka wì aih; bài bàu wì haq ma khoe tàng aih ùh i lòeq cleq, majah qmang aih jò tamàng, wì ùh yóc manoh lùì òeq hujah bàu aih ka rađeh.

3 Yàng da bèn aih bài mangai ma khoe lùì, aih jah mùt ta kan padài, wop qmang ka Boc Plình khoe doe:

“Kô bàu au hapah ta kan panòeh,
Wì haq blinh ùh jah mùt ta kan padài da au”.
Hnoq anoe qmang aih, bìac broq da haq khoe gêh
qmòe enh jò baxèm broq plình cróng taneh.

4 Majah qmang aih, anoe trùh hì ma tapèh, i bàu achìh rameh:

“Hì tapèh Boc Plình padài dǒng ka yiniq broq”.

5 Ajang qnoeq hòem, achìh rameh:

“Wì haq blinh ùh jah mùt ta kan padài da au”.

⁶ Qmang aih, khoe palauq òòeq ka qnah ngai jah mùt ta kan padài aih, mahaq bàì mangai ma khoe tàng Bàu lem aih angoe nèh khoe ùh jah mùt taiq wì haq ùh iu,

⁷ khoe aih dùnh haraya, ta bàu calêu da Đawit, Chuaq i pajaq ònh mòeq hì qnoeq hòmh hadai creò “Hì kô” tiàh ka bàu ma taboe enh ngoe iq: “Hì kô tàng pì tàng bàu haq, apaq cadoq manoh”.

⁸ Tàng joq Jôsuê khoe am wì kan padài, atiq ka aih Boc Plình ma oe ràu trùh mòeq hì ma qnoeq hòmh.

⁹ Qmang aih oe i mòeq hì padài ka mangai da Boc Plình.

¹⁰ Majah qmang aih cabô mùt ta kan padài da Boc Plình, mangai aih jah padài dèh ka yiniq broq, qmang ka Boc Plình padài deh ka yiniq broq.

¹¹ Qmang aih, bèn ep àu òiq ka padren òòeq jah mùt ta kan padài aih, òòq ùh hìaq i cabô taqne bèn cro tiaq dua bàì mangai ma ùh iu tau.

¹² Majah qmang aih bàu da Boc Plình aih bàu rìh, bàu xit, hìn ùh hnau ka chang baiq mán, pác jrùq ta bèn, loh qmòe ka jah ralah mahua, yiang, atap, tangau, chèh ngan ta gàu ngóc xam yiniq khoe qnac ta manoh cliac.

¹³ Ùh i cleq jah cadoc hlèp enh ngèa ka Boc plình, òiq òòg ep paqnoh ralènh enh ngèa haq, aih Mangai bèn ma ep taqmon hlài rìmh yiniq bèn ma khoe broq.

¹⁴ Qmang aih, pàng bèn i mòeq ngai Pajàu haqnèq khoe tót ta plình, aih la Chuaq Jesus Christ kon da Boc Plình, dài bèn majah ep wèq ka cajap trong bèn ma khoe lùì tiaq.

¹⁵ Majah qmang aih, bèn ùh i ka pajàu haqnhèq ma ùh dùh qmòe ka ha-och kan ùh nèn da bèn, mahaq bèn i mangai Pajàu khoe chiùq qnhro ta rìm yiniq qmang ka bèn, mahaq ùh jò leq broq yiniq lui.

¹⁶ Qmang aih bèn drah cajap manoh thia haten rangàu xôq ramot, ðòeq hujah kan tamèt rai chaq jah kan tabàih dech ðòeq hu wiang ti bèn jò bèn ma i yiniq nhet ðeh ka waq.

5

¹ Rìm ngai pajàu haqnhèq, ma khoe jah ràih enh kon mangai, wì dèch haq aih ðòeq broq mangai patìh am ka wì enh ngeà ka Boc Plình, ðòeq dèch ngè tadreo xam ramènh cachìt am ka yiniq lui.

² Haq aih hadai ùh nèn rìm trong, dài haq majah loq ha-och ka mangai ma lam hwang ùh qnì ðeh cleq.

³ Taiq kan ùh nèn aih dài haq majah ep dèch ngè tadreo ka raðeh, hloe xam yiniq lui da mangai qnoeq.

⁴ Èh hòim, ùh i mangai leq jah blah yóc kan ranhòm aih ka raðeh; mahaq waq ka jah Boc Plình creò tìah ka Arôn nèh.

⁵ Hadai qmang aih, Christ ùh padèch ðeh broq Pajàu haqnhèq; Mahaq Boc Plình khoe doe ka haq:

“Ìh kô Kon au,
Au khoe ha-uang ìh hì kô”.

⁶ Ajang qnoeq hòim i doe ka haq rameh:

“Ìh broq pajàu mòeq ðòe,
Tiaq apah da Menchixêðec”.

⁷ Jò Chuaq Jesus Christ oe raq rìh ta crõng taneh, haq khoe dêh bàu crò hmoe ðòeq dèch bàu waiq khàn àu bòch Mangai ma i cwìang dèch haq jah claih ka cachit, bàu haq khoe jah tamàng.

⁸ Majah qmang aih, yac ka haq aih Kon, mahaq khoe hõc yõc kan loq iu enh bài kan xalep ðeh ma glàm,

⁹ jò khoe jah gêh geo, hi wìa rangàu da kan dèch claih mòeq ðòe ka mangai iu bàu haq,

¹⁰ èh i Boc Plình doe haq broq Pajàu haqnhèq tiaq apah da Menchi-xêðec.

¹¹ Anoe trùh trong aih, bèn i bàc yiniq hu anoe, mahaq ùh hlàu cleq ka anoe dôq oh ðaq jah loq ka hloh, majah qmang aih oh ðaq khoe loh ka pi ðai qnì tàng.

¹² Majoq aih oh ðaq broq mangai hnài khoe dùnh, yàng manòeq kô aih oe raq waq ka i mangai yõc bài yiniq bu hwang hwòt enh baxèm da bàu Boc Plình hu hnài oh ðaq, oh ðaq oe raq ôq ðiac tôh, qnhòq hlàt acaq dahwèq cadoq.

¹³ Qmang aih, mangai leq rìh canòm toq ka ðiac tôh, haq ùh qnì ka trong taq atoq, majah qmang aih haq oe raq kon hin.

¹⁴ Mahaq dahwèq acaq ma gang cadoq aih ðòeq ka mangai dang kàn, am ka mangai loq i manoh àu axrà ðòeq canau ka trong lem xam trong dù.

6

¹ Qmang aih, bèn ep clech enh tau ka bài bàu hnài baxèm Bàu lem da Chirst, ðòeq trùh ta kan gêh geo, pi dùh tàc hlài xàn hnìm hò m, aih iq rameh: caðac bài biac cachit, lùì Boc Plình,

² trong hnài ramènh baptem, trong roh tì ta chac wì, trong mangai cachìt rìh hlài, trong hadrah mòeq òe.

³ Tàng joq Boc Plình lòh, aih èh bèn hi broq bài trong aih.

⁴ Majah qmang aih, bài mangai ma khoe jah sreo qngah mòeq yàng, khoe hmaq loq kan am dech enh plình, hadai khoe wiang jah Yiang Hadròeh,

⁵ loq kan nhim da bầu Boc Plình xam kan itai ta qnhòng atiq,

⁶ tàng oe tacro, aih pi oe jah broq ka wì haq raxach hlài hòh, majah qmang aih wì haq khoe tiang òh Kon Boc Plình talong pagat ka rađeh mòeq yàng hòh, rai baxep haq òh mangai hnoq òh hra.

⁷ Majah qmang aih, tanèh i diac mè yòt men loh long loh nhit, i lòeq ka mangai ma abèq, tanèh aih jah xôq ramot enh Boc Plình.

⁸ Mahaq tanèh leq ma hon toq yila, toq cađê, tanèh aih èh wì cađac, jah toq bầu ra-òh hamaiq, pulùch èh ep bùh đac.

⁹ Hnoq nhèn doe qmang aih, yôiq wì oh òh daq da au, dua nhèn oe tangèh gòm yiniq ma yeo lem ta pì, aih bài yiniq aràng pì trùh ta kan jah òh.

¹⁰ Boc Plình ma i ùh taq atiq, haq ùh hèt yiniq broq xam manoh loq waq da oh òh khoe paqnoh ka yiniq haq jò oh òh patih am ka mangai da haq, trùh manòeq kò dua pì oe raq patih.

¹¹ Mahaq nhèn ngèh rìm ngai tapì òh i manoh loq nhit qmang aih òh kan tangèh da oh òh jah broq gèh trùh lùch.

¹² Qmang aih oh daq ùh hìaq loh ka ra-òeq, mahaq top dua bài mangai i manoh lùì xam kan loq kềm men khoe jah waq kùng hang tiaq bàu Chuaq ma khoe têu am.

¹³ Jò Boc Plình têu bàu ka Apraham, pàng pi i qmòe cabô ma yeo haqnhèq loe, dài haq majah patô cla rađeh ðòeq hapah ka Apraham.

¹⁴ Haq doe rameh: Kô èh Au am ka ìh xôq ramot bàc joq qnàng rai broq ka xinoe ìh jah ha-uang tam ka bəc.

¹⁵ Qmang aih, Apraham chiùq àt chiùq gòm, aih men jah bàu ma khoe têu am ka rađeh.

¹⁶ Kon mangai wì yôc yiniq mangai ma yeo kàn ka rađeh ðòeq hu hapah, tàng loq i yiniq tarahen, wì yôc bàu hapah aih ðòeq hu panhìn ka cajap.

¹⁷ Boc Plình hadai qmang aih, enh broq ka bài mangai majah waq bàu haq ma têu am loq ka haq ùh tablòq manoh, dài aih haq majah yôc bàu hapah;

¹⁸ ðòeq canòm ka baiq yiniq ma ùh jò leq tablòq aih, baiq yiniq aih Boc Plình ðìq ùh capoch qnùt, bèn chaq jah kan alòng kàn, bèn aih mangai khoe cadàu tùh tanòe hanhàng, jah cadop yôc kan tangèh ma khoe ðòeq enh ngèa bèn.

¹⁹ Bèn wèq kan tangèh aih tìah ka long tanàp da mahua yiang, cajap cajình mùt trùh enh tau ka bai prình,

²⁰ aih nòe hadròeh, Chuaq Jesus tìah ka Mangai pèh trong khoe lam adroe ka bèn, majah qmang aih haq khoe broq Pajàu haqnhèq mòeq ðòe tiaq apah da Mênchixêdec.

7

Mênchixêdec

¹ Mênchixêdec aih bùa da Salem, pajàu kàn da Boc Plình ma dìq jaq haqnhèq, khoe loh ãđìh Apraham rai waiq am xôq ramot jò haq tawìh hlài enh nòe haq tajêh khoe blêq bài bùa;

² Apraham yỏc mỏeq ta mỏeq jàt phàn kùng hang rađeh ãđeq dẻch ka bùa. Mênchixêdec ngiàh ma adroe aih la: bùa da kan taq atỏq, ngiàh atìq ka aih hỏm bùa da Salem aih bùa da kan catẻm;

³ haq ùh i ka baq ka miq, ùh i ka nang noe, ùh i ka hì baxẻm ha-uang, ùh i ka hì cachìt, qmang ka Kon Boc Plình broq pajàu mỏeq ãđoe.

⁴ Hẻm beq, jaq cla Apraham aih kan cadraq bẻn khoe yỏc mỏeq ta mỏeq jàt phàn ma ãđìq jaq lem tabài dahwẻq haq khoe jah blah yỏc ãđeq dẻch ka bùa, aih bùa aih haq haqnhẻq ãđang leq.

⁵ Tiaq ranenh bài xinoe Lêwi ma broq pajàu, i cwìang tigop yỏc mỏeq ta mỏeq jàt phàn enh mangai jàn, aih la enh hadrẻng cla majah qmang aih cla wì haq hadai loh enh Apraham.

⁶ Yac ka Mẻnchixẻdec ùh xài xinoe da Lêwi, mahaq haq jah yỏc mỏeq ta mỏeq jàt phàn da Apraham rai waiq xôq ramot ka mangai ma jah waq bàu tẻu am da Boc Plình.

⁷ Manẻq kỏ mangai ma yeo haqnhẻq waiq xôq ramot ka mangai ma yeo haqneq, trong aih pì ep rahen dẻh.

⁸ Loq ka ajang kỏ, bài mangai ma tigop yỏc mỏeq ta mỏeq jàt aih ãđìq bài mangai loq cachìt: yẻng ajang tau hỏm, aih mangai ma i bàu panhẻn ãđoe haq qnang rẻh.

⁹ Qmang aih bèn jah doe qmang kô: Lêwi aih mangai tigop yôc mòi eq ta mòi eq jàt phàn, cla haq hadai khoe dèch mòi eq phàn mòi eq jàt tiaq ajang Apraham;

¹⁰ majah qmang aih, jò Mênchixêdec loh ðih Apraham, jò aih Lêwi oe raq ta chac Apraham.

¹¹ Tàng ma loq jah kan lem geo canòm ka mangai Lêwi broq pajàu (majah qmang aih Ranenh khoe jah am ka kon mangai jò wì haq oe raq enh qneq ka cwiàng da pajàu), aih hagleg ma oe waq ka padèch ònh mòi eq ngai pajàu qnoeq, tiaq apah da Mênchixêdec, ùh tiaq xinoe da Arôn?

¹² Qmang aih, khoe halìh pajàu aih èh ranenh hadai ep waq ka halìh diq.

¹³ Mangai bài bàu aih ma anoe trùh, oe ta xinoe qnoeq, xinoe aih qnhòq hmaq i cabô patìh nòe prang tadreo.

¹⁴ Majah qmang aih, Chuaq da bèn loh enh xinoe Jiudà, xinoe aih Môise ùh i ràu trùh trong broq pajàu.

¹⁵ Trong aih yeo ro hòm, jò bèn hnoq i mòi eq ngai pajàu qnoeq jah dèch paqnàng, tiah ka Mênchixêdec,

¹⁶ dèch paqnàng ùh tiaq ranenh da kon mangai, mahaq tiaq cwiàng itai da kan rìh halình ùh jò leq hnhung lùch.

¹⁷ Hacô bàu panhìn ka haq:

“Kon broq pajàu mòi eq ðòe.

Tiaq apah da Mênchixêdec”.

¹⁸ Qmang aih, ranenh ma adroe nèh ùh i ka cwiàng ùh i ka lòeq cleq dài majah khoe cađac;

¹⁹ majah qmang aih, ranenh ùh broq gêh qmòe cleq, èh hòim i mòeq kan canòm qnoeq, ma yeo lem aràng am ka bèn, kan canòm kô ma broq ka bèn jah haten ka Boc Plình.

²⁰ Yeo hnau ka aih hòim i bàu hapah, wì ma qnoeq broq pajàu ùh i ka bàu hapah,

²¹ yàng haq khoe jah dèch paqnàng xi bàu hapah, jò Boc Plình doe ka haq:

“Chuaq khoe hapah, èh pi jò leq haq tablòq manoh,

Kon broq pajàu mòeq òe”.

²² Qmang aih, Chuaq Jesus khoe wìa Mangai broq ka cajap bàu tajao maneo lem yeo hnau ka ma dùnh.

²³ Èh hòim, bài mangai broq pajàu aih bàc, mahaq kan cachit khech tàt dài wì haq ma ùh jah broq hloe.

²⁴ Yàng Chuaq Jesus aih halình yôt, dài haq jah broq pajàu mòeq òe.

²⁵ Qmang aih, haq majah i cwìang dèch dìq dǒng bài mangai canòm ka haq òeq hu thia ten ka Boc Plình, majah qmang aih haq rìh halình òeq waiq khàn am ka wì aih.

²⁶ Aih ma joq pajàu haqnhèq ma troq ka bèn, hadròeh, ùh i ka yiniq lui, hliang lem, lah ðeh crài ka mangai i tuiq, jah dèch atóc yeo haqnhèq ka tróc:

²⁷ ùh tiàh ka bài pajàu haqnhèq ma qnoeq, ep dèch ramènh tadreo rìm hì, angoe aih ka yiniq lui da cla, atiq aih ka yiniq lui mangai qnoeq; Haq dèch ramènh mòeq yàng raq khoe gêh geo hloe, dèch chac cla haq broq ramènh tadreo.

²⁸ Majah qmang aih, ranenh yǒc bài mangai ma ùh nèn dèh dùnh broq pajàu haqnhèq; mahaq bàu hapah ma i atiq ka hset ranenh aih dì cla Kon, aih Mangai ma gêh geo mǝeq ðòe.

8

Pajàu haqnhèq da tajao neo

¹ Bài yiniq nhèn maneo anoe kô, ma palênh aih rameh: Bèn i mǝeq ngai Pajàu haqnhèq, haqngui enh qma gèq Bùa Haqnhèq ta diac plînh,

² qnang broq Mangai patîh tanòe hadròeh xam ta hnîm ranòh joq qnàng, broq loh enh tì kǝng Chuaq ùh xài loh enh tì kǝng kon mangai.

³ Rîm ngai ma khoe jah dèch tǝc broq pajàu haqnhèq aih ðòeq dèch ramèn̄h xam ngè tadreo, qmang aih haq kô ep dèch ramèn̄h cleq.

⁴ Tàng haq oe raq ta crǝng taneh, aih haq ùh xài pajàu haqnhèq, majah qmang aih ta crǝng taneh i bàc ngai pajàu dèch ramèn̄h tadreo tiaq bàu ranenh thê,

⁵ wì patîh ta hnîm kùh waiq, mahaq hnîm kùh waiq aih broq dua qmù da bài yiniq oe ta plînh, tìah ka jò Môise padon broq hnîm ranòh, Boc Plînh i pariaq haq: “Rabîaq oq, broq rîm yiniq troq tiaq dua au khoe patô ka ìh ta bui wang”.

⁶ Yàng manòeq kô, yiniq broq da Chuaq Jesus khoe yeo haqnhèq ka da wì qnoeq, majah qmang aih haq aih mangai taqne da tajao ma yeo lem, tajao aih loh enh bàu tǝu am ma yeo lem.

⁷ Majah qmang aih, tàng joq tajao ma adroe ùh hìaq thiùq qmòe cleq, aih ma i ka nòe hu broq tajao ma atiq.

8 Mahaq Boc Plình cwò ka mangai Jiũa, haq doe:

“Chuaq doe, tabài hì ma padon trùh kô èh,
Aih jò au pagêh tajao maneo ka hnim Isorali xam
hnim Jiũa,

9 Ûh tiàh ka tajao au ma broq ti bôc yaq wì haq,
Aih hì au ma cadop kông wì haq, ajèn wì loh enh
diac Êdip.

Pàng wì haq ùh cajap manoh wèq tajao da au,
Dài au majah ùh blèch ngan wì, aih bàu Chuaq
doe”.

10 Chuaq doe hòm:

“Kô bàu tajao au am ka hnim Isorali,

Atiq ka hì aih:

Au ðòeq ranenh da au ta gàu wì;

Achìh qmùt ta cliac wì haq,

Au broq Boc Plình wì,

Wì haq jah broq mangai da au.

11 Taqne wì haq, pi i ka cabô oe ep hnài dèh
mangai haten hatia,

Xam oh daq da cla rameh: Drah canau loq ka
Chuaq;

Majah qmang aih dìq dõng ka wì haq;

Enh mangai ma dìq jaq hamoq trùh mangai ma
dìq jaq kàn dìq jah loq

ka au,

12 Majah qmang aih, au caqnaih dõng kan dù wì
haq,

Pi hmàng trùh yiniq lui wì haq hòm”.

13 Creo ka ma kô aih “tajao maneo”, qmang aih
haq khoe broq ka tajao ma adroe khoe wìa ma
dùnh, qmang aih yiniq cleq ma khoe dùnh, khoe
tagôi, aih èh hì padon hnhung lùch ðeh.

9

¹ Tajao adroe nèh hadai i bài ranenh kùh waiq xam mœq nœ hadrœh oe ta crœng taneh.

² Qmang aih, mœq toq hnim ranœh kùh waiq khoe jah broq, hagan adroe creo dœh nœ hadrœh, i jœnh đœn, cabœng xam bœnh padon ta aih,

³ khoe aih trũh hagan enh dalam ka bai prĩn, aih nœ dĩq jaq hadrœh,

⁴ ta aih i prang kùh waiq broq xi wang, xam hom tajao, dĩq jah glom xi wang. Ta hom aih i mœq toq cabi broq xi wang ta aih tah bĩnh mana, mœq toq long dĩu đũ Arœn, baiq capiac hmo tajao,

⁵ enh crœng calũp hom i baiq chœrubim qngah qngai hlia panan, qmũ haq yũp dĩq tanœ baxon yiniq lui. Mahaq kœ aih ùh xài jœ arœn taqmon ka hloh bài trong aih.

⁶ Rĩm yiniq khoe jah taqmroq qmang aih, rĩm hĩ bài pajũ mùt ta hagan ma adroe ta hnim kùh waiq đœeq pagœh trong ramœnh kùh waiq;

⁷ mahaq, ta hagan baiq, aih mœq hanam mœq yàng, mœq ngai cla pajũ haqnhœq raq ma jah mùt, ùh jœ leq ma ùh wœ mahĩm hu dœch ramœnh ka yiniq lui cla xam yiniq lui dĩq ka mangai.

⁸ Yiang Hadrœh yœc ajang aih đœeq mahnu: waq toq oe raq i hnim ranœh kùh waiq ma adroe, aih œh trong mùt tanœ dĩq jaq hadrœh qnhœq jah pœch.

⁹ Aih đœeq hu aliah ka bœn qnhœng manœq, đœeq hu patœ bài trong kùh waiq xam ramœnh tadreo aih ùh broq ka manoh mangai kùh waiq jah geo lem.

¹⁰ Aih xài bài ranenh da chac hamac. Ta aih toq bài dahwèq acaq xam dahwèq ôq xam bài ranenh qnheo crài ka dabau. Gòm trùh hì broq ònh tajao maneo.

¹¹ Mahaq jò Christ khoe trùh broq pajàu haqnèq da bài kan lem ma atiq kô; Haq khoe mùt ta hnim ranòh kùh waiq ma yi kàn, ma yi geo, ùh xài broq loh enh tì kǝng kon mangai, hadai ùh xài taqnghòng kô.

¹² Haq khoe mùt tanòe dìq jaq hadròeh mòeq yàng raq khoe lap am ka dìq dǝng, ùh wê mahim bubi xam mahim kon ðo, mahaq yǝc qmòe mahim cla, ðòeq hujah baxon hlài yiniq lui mòeq ðòe.

¹³ Tàng joq mahim bubi calô, ðo calô xam loc ðo adrùh wì ma yǝc chùi ta chac mangai ma ùh sròeh aih xǝq jah broq ka xech akia wì jah hadròeh,

¹⁴ loq ka mahim da Christ, aih Mangai ma canòm ka Yiang Hadròeh halinh mòeq ðòe, yǝc chac cla raðeh ma ùh i qmòe ka xit ka habau dèch am ka Boc Plinh, qnheo hreo manoh cliac bèn pi hiaq oe patih ka kan cachit hòm, ðòeq hujah patih ka Boc Plinh ma rih halinh, aih dàng leq!

¹⁵ Ajang aih raq, Haq aih mangai taqne da tajao maneo, dǝq jò haq khoe chiuq cachit haq jah baxon bài yiniq lui ma khoe broq jò oe enh qneq ka tajao ma dùnh, aih èh mangai ma jah creò jah trùh yǝc kùng hang mòeq ðòe ma khoe tèu am ka raðeh.

¹⁶ Majah qmang aih jò khoe achih jàiq tanap, aih èh ep gòm mangai ma tanap cachit hòeq.

¹⁷ Jàiq tanap aih i cwiang atiq ka jò mangai tanap cachit, majah qmang aih waq toq mangai

tanap oe rih, jàiq aih ùh i cwìang cleq.

¹⁸ Qmang aih tajao ma adroe hadai yõc mahim hu broq.

¹⁹ Jò Môise khoe anoe dìq dõng bài bàu ranenh thê am dìq ka mangai tamàng, haq i yõc mahim kon bo xam mahim bubi calô, pajum xam diac, haq yõc caxy capaih gòh xam hamenh cachiq xõnh da arat ta hset xam dìq dõng ka mangai,

²⁰ haq doe: Kô mahim tajao Boc Plinh ma khoe thê pì wèq tiaq.

²¹ Khoe aih haq yõc mahim aih da arat ta hnim ramòh kùh waiq xam rìm yiniq oe ta aih.

²² Tiaq ranenh: rìm yiniq dìq canòm ka mahim men jah hadròeh, ùh ta-ùc mahim ùh i kan paclaih yiniq lui.

²³ Qmang aih, tàng joq rìm radua qmù òòeq patiah ka bài yiniq ma oe ta plinh ep qmang aih men jah basròeh, aih èh chac bài yiniq ma oe ta plinh kiang ma ep canòm ka ramèn ma yeo lem men jah hadròeh.

²⁴ Majah qmang aih Christ ùh mùt tanòe hadròeh loh enh tì kõng kon mangai ma broq tiaq dua da nòe hadròeh joq qnàng, mahaq mùt qmòe ta plinh, òòeq manòeq kô haq yòng am ka bèn enh ngèa Boc Plinh.

²⁵ Aih ùh xài haq mùt ta aih òòeq dèch raðeh broq ramèn tadreo bàc yàng tiah ka bài pajau haqnèq mòeq hanam mòeq yàng mùt tanòe dìq jaq hadròeh òòeq hu dèch mahim mahaq ùh xài mahim cla;

²⁶ tàng ùh qmang aih, enh jò baxèm broq plinh crõng taneh trùh manòeq, haq khoe ep xalep bàc

yàng. Mahaq manòeq kô ta qnhòng ma atiq lùch, haq khoe loh qmòeq yàng raq, yôc cla raðeh broq ramènñ tadreo ðòeq hu paclaih ðöng bài yiniq lui.

²⁷ Tìah ka ma khoe pajaq, kon mangai ep cachit mòeq yàng, khoe aih ep chiuq kan hadrah,

²⁸ hanoh qmang aih, Christ khoe dèch raðeh broq ramènñ tadreo mòeq yàng raq ðòeq dèch yiniq lui da bàc ngai; Haq hadai trùh hòmm yàng baiq, ùh xài ðòeq dèch yiniq lui hòmm, mahaq ðòeq am kan dèch paclaih ka mangai ma gòm haq.

10

Ramènñ da Jesus mòeq yàng raq khoe lap

¹ Ranenh aih qmù da bìac lem hì atiq, ùh i ka chac joq qnàng, dài ma canòm ka ramènñ tadreo rìm hanam qmang aih, ùh jò leq broq ka mangai ma thia haten ka Boc Plình jah lem geo.

² Tàng loq jah, aih bài mangai kùh waiq mòeq yàng raq khoe jah hreo manoh cliac wì haq ma oe qnì ka yiniq lui hòmm, ajàng aih ajoq wì khoe hêq ka dèch ramènñ tadreo qmòh?

³ Majoq qnàng, bài ramènñ tadreo rìm hanam aih ðòeq bahmàng da wì haq yiniq lui.

⁴ Majah qmang aih, mahim òo calô xam mahim bubi calô ùh jah lèh caqnaih yiniq lui.

⁵ Dài qmang aih, jò Christ loh ta cröng taneh kô, haq i doe:

“Boc Plình ùh enh bài kùng hang xam ramènñ tadreo.

Mahaq khoe palauq ðòeq ka au mòeq toq chac.

⁶ Boc Plình ùh waq,
Yac ka tadreo bùh, tadreo baxon.

⁷ Khoe aih, au hi doe:
Hacô au khoe trùh, ta hset i achìh trùh au –
Au trùh òòeq broq tiaq manoh Ìh ma enh, ôi Boc
Plình da au”.

⁸ Adroe haq khoe doe: “Boc Plình ùh enh, ùh
waq yac ka tadreo rìh, tadreo bùh, tadreo baxon,
aih bài yiniq ma ep broq tiaq bàu ranenh thê; Atìq
aih haq doe: “Hacô au khoe trùh òòeq broq tiaq
manoh Ìh ma enh.”

⁹ Qmang aih, Chuaq khoe cađac yiniq ma adroe,
dì tiaq yiniq ma atìq.

¹⁰ Tiaq manoh haq enh qmang aih, dài bèn
majah hadròeh canòm Chuaq Jesus Christ dèch
deh chac broq ramènh mòeq yàng raq khoe lap
am ka dìq dǒng.

¹¹ Bài pajàu maqnoeq rìm hì yòng patìh rai dèch
hlài mòeq ramènh tahatìah, aih ramènh ma ùh jò
leq jah dèch đac yiniq lui,

¹² yàng da Pajàu kô, taiq dìq dǒng yiniq lui haq
dèch ramènh mòeq yàng raq, khoe aih hì haqngui
mòeq òòeh enh qma Boc Plình,

¹³ pang aih ta atìq, gòm toq trùh hì bài mangai
ma tablêq ka haq ep jah roh broq radua enh qneq
ka jènh Haq.

¹⁴ Canòm ka ramènh tadreo dèch mòeq yàng
aih raq, Chuaq broq ka mangai ma lùì haq jah
hadròeh gèh geo mòeq òòeh.

¹⁵ Yiang Hadròeh hadai wiang panhìn ka bèn;
majah qmang aih atìq ka bàu doe:

¹⁶ Chuaq doe: “Kô tajao au broq ka wì haq,
Atìq ka bài hì aih èh,
Au òòeq ranenh da au ta cliac wì haq
Achìh òòeq ta gàu wì haq.”

17 Èh doe hòm:

“Au pi hmàng trùh yiniq lui ngang dù da wì haq hòm.”

18 Manòeq kô, nòe leq yiniq lui khoe jah caq-naih, aih pi ep dèch ramènh tadreo ka yiniq lui hòm.

19 Qmang aih, oh daq da au, taiq bèn khoe canòm ka mahim Chuaq Jesus, dài ma pi hòq ka mùt tanòe dìq jaq hadròeh,

20 tiaq trong neo, trong rìh haq ma khoe pèch pagat enh tau ka bai prìn, aih la pagat ka hanang cla Haq,

21 qnah hòm, bèn i mòeq ngai Pajàu kàn khoe jah dèch paqnàng broq mangai wèq hnim Boc Plình,

22 dài bèn majah ep drah yǒc kan lem jang, manoh lùì cajap cajình, xam manoh cliac khoe jah qnhreo hreo ka trong qmèq, chac mac jah qnheo xi diac hliang, òeòeq hu thia haten ka Chuaq.

23 Bèn hadai ep wèq cajap ùh dalàc dèh bàu bèn ma khoe anoe qnoh deh kan tangèh, majah qmang aih Mangai ma khoe tèu bàu am ka bèn aih ùh tablòq manoh.

24 Mangai leq mangai meh ep hmàng ngan dabau òeòeq hu pariaq dabau trong manoh loq waq xam trong broq yiniq lem;

25 apaq cađac bìac tagop ti dabau tìah ka bài mangai ma khoe hmòt broq, mahaq ep alòng dabau, oh daq hnoq hì aih khoe haqnap dàng leq kiang oh daq ep nhet dàng aih.

26 Majah qmang aih tàng bèn khoe loq ka bàu joq qnàng, yàng oe raq to broq yiniq lui, aih èh pi i ka ramènh leq òeòeq hu baxon hlài yiniq lui hòm,

²⁷ mahaq rap gòm toq kan ramòt ta hì hadrah xam ùnh khàng dra adrènh bùh cheo mangai ma enh tablêq ka Boc Plình.

²⁸ Mangai leq broq ùh troq ka ranenh Môise, tàng i baiq piq ngai wiang panhìn, aih èh ep jêh đac ka cachit ùh adênh,

²⁹ loq ka mangai ma jôiq padit Kon da Boc Plình, ngan mahim tajao, aih mahim đeh ma canòm đòeq hu jah hadròeh, capoch halê đac ka Yiang Hadròeh ma am kan tabàih dech, oh daq ma xoh mangai aih claih ka kan hadrah baxa yi hnau qmòh?

³⁰ Majah qmang aih bèn loq Mangai ma doe: “Kan patem đìq oe ta au, brì ka au patem chau”. Èh doe hòm: “Chuaq hadrah bài mangai da haq”.

³¹ Taclich ta tì kống Boc Plình rìh halình aih joq ramòt qnàng!

³² Drah hmàng hlài jò baxèm, aih atiq ka pì khoe jah kan qngah, aih hì i kan tablah nanxa kàn;

³³ tang qnah aih chiuq kan camaih, kan baxa budàng broq kan racaih ka phù cròng ngan, i jò aih wiang chiuq kan xalep ka bài oh daq qnang hadai glàm trong qmang aih.

³⁴ Oh daq khoe ha-och ka mangai ma wì ma rùp clêh, manoh oh daq dua lem bùi jò wì ma blah yóc da pì kùng hang, majah qmang aih oh daq loq rađeh i kùng hang ma yeo lem, ùh đìq ùh hnhung.

³⁵ Qmang aih apaq cađac manoh cajap cajình da rađeh, majah qmang aih i kan baha kàn khoe palauq đòeq ka oh daq.

³⁶ Oh daq ep chiuq àt, đòeq jò khoe jah broq tiaq trong manoh Boc Plình, aih èh oh daq hì jah waq

bàu haq ma khoe têu am.

³⁷ Majah qmang aih:

“Oe toq biaq hòm, joq toq biaq hòm,
Mangai ma padon trùh hi trùh; Haq ùh patrò.

³⁸ Mangai taq atoq da au rih xi manoh lùì,
Tàng loq talùi, aih èh mahua yiang au joq ùh bùi
ka haq”.

³⁹ Yàng da bèn kô, ùh xài mangai talùi òòeq hu
hnhung lùch mahaq mangai wèq deh manoh lùì
òòeq mahua yiang jah dèch claih.

11

¹ Manòeq kô, manoh lùì aih la kan loq deh joq
qnàng ta òiac bèn qnang ngèh, aih kan panhìn da
bài yiniq bèn ma qnhòq hnoq.

² Canòm ka manoh lùì dài wì craq dùnh calah
nèh ma khoe jah bàu manè enh.

³ Xam manoh lùì, bèn loq crống tanèh khoe jah
broq loh enh bàu Boc Plình, qmang aih bài yiniq
xau hnoq òiq loh enh yiniq ùh xau hnoq.

⁴ Xi manoh lùì, Abên khoe dèch ka Boc Plình
mòeq ramènh tadreo yeo lem da Ca-in. Ajang
aih majah creò ka haq mangai taq atoq, jò Boc
Plình capoch manè enh rai òi yòc ramènh da haq,
canòm ka manoh lùì yac ka khoe cachit dua haq
oe raq capoch.

⁵ Xi manoh lùì, Hênoc jah dèch atóc, ùh hìaq
hnoq kan cachit; pì i cabô oe hnoq haq taleq hòm,
majah qmang aih Boc Plình khoe òih atóc haq.
Majah qmang aih adroe ka jah dèch atóc, khoe i
bàu manè haq aih mangai rih lem ka manoh Boc
Plình.

⁶ Ûh i manoh lùì ùh broq qmang leq majah lem ka manoh Boc Plính; majah qmang aih mangai thia haten ka Boc Plính ep lùì i Boc Plính, èh hòm haq aih mangai loq baha ka cabô ti chaq haq.

⁷ Xi manoh lùì, Nô-ê jah Boc Plính patìn ka haq loq bài yiniq qnhòq i hnoq; haq aih mangai diq ka manoh iu yùq, broq mòeq toq boang kàn ðòeq hu dèch deh hnīm cla; haq patô qnoh yiniq lui da crông tanēh, qmang aih haq jah wìa mangai taq atoq trùh enh manoh lùì.

⁸ Xi manoh lùì, Apraham iu bàu Chuaq creolam tagùng haq hujah ðòeq broq deh kùng hang: Haq lam mahaq ùh qnì ðēh lam taleq.

⁹ Xi manoh lùì haq rìh tagùng ma khoe tēu am ka haq, tiàh taiq ka mangai ma oe ðēh ta diac wì, rìh ðēh roc hnīm ranòh tiàh ka Ysac tiàh ka Jacôp, aih la bài mangai hadai jah bàu tēu am tiàh ka haq.

¹⁰ Majah qmang aih haq gòm mòeq toq plài i xēm cajap Boc Plính ma khoe broq loh.

¹¹ Hadai xi manoh lùì, Sara yac ka khoe bàc hanam, mahaq dua i padren ha-uang kon, majah qmang aih haq loq Mangai ma tēu bàu ka raðēh, haq aih ùh tablòq manoh.

¹² Qmang aih, enh mòeq ngai craq khoe ten cachìt, jah ha-uang loh kon xau ma raya, cràm tiàh ka halǒng ta trǒc, bàc qmang ka braih diac raxìq, pi diq rēn.

¹³ Wì aih diq cachìt ta manoh lùì, qnhòq jah waq yiniq ma khoe tēu am ka wì haq, toq hnoq rai prǒnh ðēh enh hangai, doe ðēh kô tamoe hangai, mangai lam clòh ta crông tanēh.

14 Bâi mangai ma anoe qmang aih, aih wî doe ðeh kô qnang ti chaq ðeh gùng.

15 Tàng wî hêm trùh ðeh gùng, aih nòe wî haq ma khoe loh enh aih, aih èh i hî wî tawîh hlài,

16 mahaq wî bêh mòeq toq gùng ma yeo lem, aih gùng ma oe ta plînh; aih iq dài Boc Plînh ma ùh camaih ka doe ðeh kô Boc Plînh da wî aih, majah qmang aih Boc Plînh khoe padon ðòeq ka wî haq mòeq toq plài.

17 Xi mnoh lùì jò Boc Plînh qnhro Apraham, haq ðèch Ysac aih kon mòeq da haq broq ramènh tadreo: aih kon haq ma khoe jah enh bàu tèu am.

18 kon aih raq Boc Plînh ma i doe: “Enh dalam Ysac kô èh men i mòeq nang noe wê yiniq ìh”.

19 Haq hêm ðeh ta manoh Boc Plînh i cwîang broq ka mangai cachìt rìh hlài; qmang aih i crài cleq ka haq jah hlài ðèh kon enh mangai cachìt.

20 Xi manoh lùì, Ysac waiq xôq ramot am ka Jacôp xam Êsau ta bàì yiniq padon trùh tangèa kô èh.

21 Xi manoh lùì Jacôp jò ten cachìt, waiq xôq ramot ka baiq ngai kon da Jôsep. Khoe aih haq rai cachàt ðèh ajang long canhra rai kùh waiq.

22 Xam manoh lùì, jò ten cachìt Jôsep haq anoe trùh biac mangai Isorali jah loh enh Êjip rai tanap ka wî trùh biac catùh caxènh da haq.

23 Xi manoh lùì, jò Môise bu ha-uang, miq baq haq cadôc haq piq khê, majah qmang aih wa hnoq kon aih lem alàng, wa pi yùq qmòe ka bùa loq nòeh.

24 Xi manoh lùì, Môise jò khoe radam, pi dôq wî

creo ka rađeh kô kon calô da kon cadrì da Phara-ôn,

²⁵ wiang nan xa pajùm ti mangai da Boc Plình aih haq yì lènh ùh hnau ka lem bùi hyòq mòeq rahyàc ta trong yiniq lui:

²⁶ haq ngan kan chiùq xep ka Christ aih yeo khòh ùh hnau ka hang canaq da Êjip, majah qmang aih mat haq haqmiang gòm yôt dèh kan baha.

²⁷ Xi manoh lùì haq cađac gùng Êdip ùh crè ka bùa nòeh, majah qmang aih haq yòng cajap tìah gleq hnoq qmòe Mangai ma ùh xau hnoq.

²⁸ Xi manoh lùì, haq wèq ramènh Pancwa rai broq ramènh púc mahim, dōq kiac palùng ùh hìaq jêh đac kon ramua da mangai Isorali.

²⁹ Xi manoh lùì, mangai Isorali lam pagat diac Rasìq gòh tìah ka lam ta taneh croh, yàng mangai Êdip àu lam diq, hi cram dōng ta aih.

³⁰ Xi manoh lùì, bài panàt plài Jêricô hrùq taclìh dōng, atìq ka wì khoe lam dudan ka haq tapèh hì.

³¹ Xi manoh lùì, Rahap (aih mangai gucadrì tech rađeh) ùh cachit pajùm ti bài mangai ùh lùì, majah qmang aih haq lem manoh đìh bài mangai ma lam rinh ta aih.

³² Au oe anoe cleq hòm? Majah qmang aih khoe pì tem tàng joq au enh anoe trùh Giđê-ôn, Barac, Jephthê, Dawit, Samu-ên xam bài pajàu qnoeq.

³³ Wì aih, xi manoh lùì khoe jah blêq bài diac qnoeq, broq kan taq atoq, jah waq bài bàu têu am, bàng hacùng baco,

³⁴ plah pat pla ùnh khàng ma nga angèn, claih ka pla chang, tablêq ka yiniq, paqnoh dèh kan

tanoq tanòe tajêh tablah, broq ka bài lình diac wì ep cadàu amot.

³⁵ I mangai cadrì khoe jah deh mangai ta hnim cachit rìh hlài, i ngai chiùq kan xa-ep dìq jaq, mahaq ùh dôq cabô paclaih rađeh, ðòeq hujah waq kan rìh hlài ma yeo lem.

³⁶ I ngai chiùq dôq wì do halê rađeh, chiùq blai, chiùq clang, chiùq clêh.

³⁷ Chiùq dôq wì ðáp rađeh xi hmo ka cachit, pot loh baiq xi kùa, pác xam chang; pac lac jàp jìa, caxùnh ðeh bài akia trìu, akia bubi, ùh i ðeh rìm ka yiniq, chiùq wì hnen glua, baxa padit.

³⁸ Crông taneh kô ùh tajì ka wì haq rìh, ep pac lac tagùng hawit, tawang, takòp, roc hàm ta taneh.

³⁹ Dìq dõng wì aih khoe jah bàu capoch manè ka manoh lùì da wì haq, mahaq wì haq qnhòq lòm jah waq yiniq ma khoe tèu am ka rađeh.

⁴⁰ Majah qmang aih Boc Plình i palauq ðòeq bài yiniq ma yeo lem hu am ka bèn, dôq wì aih pajùm ti bèn ðòeq hadai jah geo lem.

12

Ngan tiaq dua Jesus

¹ Qmang aih, pàng bèn jah bàc ngai ngan hnoq qnang oe dudan bèn tiàh ka cato yùc kàn, bèn hadai ep khwênh dõng bài kan trap xam yiniq lui ma loq tawac ka bèn, yõc manoh ùh tagah lep ðòeq cadàu tiaq trong ma khoe padon am ka bèn,

² mat bèn ngan toq dua Chuaq Jesus, aih mangai ma baxèm rai pagêh da bèn manoh lùì, pàng kan lem bùì khoe ðòeq qmòe enh ngèa cla, haq

chiuq cachit talong pagat, ùh dèh ka kan camaih, manòeq kô haqngui enh qma ka gèq Boc Plinh.

³ Qmang aih, oh daq ep hèm trùh Mangai ma khoe chiuq kan tablêq enh bài mangai yiniq lui, òòeq oh daq ùh hìaq lep tagah manoh.

Boc Plinh hnài mangai da Haq

⁴ Oh daq tablêq ka yiniq lui qnhòq hìaq ep ta-ùc mahim;

⁵ oh daq ma khoe hèt dǒng ka bàu ma pariaq oh daq tiah ka bàu baq ma hnài deh kon qmòh? bàu aih rameh:

“Kon da au, apaq jù đac bàu hnài enh Chuaq,

Èh jò Chuaq cwò, apaq talùi manoh;

⁶ Majah qmang aih Chuaq hnài dèh mangai haq maloq waq,

Mangai leq Haq ma dì broq dèh kon aih haq blai xi long roe”.

⁷ Tàng oh daq chiuq kan hnài, aih Boc Plinh ngan oh daq tiah dèh ka kon cla, majah qmang aih i kon leq baq ma ùh lech hnài?

⁸ Mahaq tàng oh daq jah claih ka kan lech hnài mangai qnoeq ma chiuq đeh hra, oh daq aih la kon tango, ùh xài kon joq qnàng.

⁹ Baq ta taneh kô tiaq deh manoh cla lech hnài, aih diq bèn loq iu bàu, loq ka Baq da mahua yiang, aih ma ùh joq bèn khòh iu yùq ma yeo hnau hòm òòeq hujah kan rìh qmòh?

¹⁰ Baq ta taneh kô, tiaq trong wì haq ma hèm dèh lem òòeq hnài òò bèn ùh i dùnh, yàng Boc Plinh gùt bàt bèn aih dōq jah lòeq ka bèn, òòeq bèn hujah kan hadròh ti haq.

¹¹ Joq qnàng kan gùt bàt jò baxèm aih hnoq tìah gleq broq nen ka bèn mangò, ùh xài kan lem bùi, mahaq atìq èh caqmon loh plì taq atòq, catèm am ka bài mangai ma khoe axrà m qmang aih.

¹² Qmang aih, oh daq drah dèch dèh capiang tì ma ùh nèn, hloe xam cràng ma khoe tabat.

¹³ Dra h palauq trong òòeq jènh oh daq jah cadiang lam, òòq yac ka mangai cwê dua ùh hìaq lac trong mahaq jah kan broq brêh.

Apaq cađac bàu Boc Plình pariaq hnài

¹⁴ Dra àu rìh hatroq ti rìm ngai, rai chaq tiaq kan hadròeh, majah qmang aih tàng joq ùh wìh wìa hadròeh ùh cabô jah hnoq Boc Plình.

¹⁵ Ep rabiaq jaq cajoq, yùq loq i mangai capòch ka kan tabàih òech da Boc Plình, beq rayeq riàh xang plòh loh, broq kan manhài xam kan ùh sròeh ka bàc ngai.

¹⁶ Ngan oq, taqne oh daq apaq i mangai loq tango taqnung, hadai paq i cabô loq blìa racaih qmang ka Êsau, mòeq nà acaq raq mahaq chiuq tech deh cwìang kon ramua.

¹⁷ Joq oh daq loq, atìq ka aih haq enh jah bài xôq ramot aih ka rađeh, yàng khoe pi jah; majah qmang aih yac ka haq crò hmoe creò dang, dua khoe pi jah blòq hlài manoh baq haq ma khoe òi.

¹⁸ Oh daq ùh i trùh haten ka búi wang kon mangai jah bèq, hadai ùh trùh haten ka ùnh khàng ma adrènh, hadai ùh xài thia haten kan clam cluiq, ta yùc gam, tanòe cayeò kàn,

¹⁹ tanòe ken atêh bàu dèh, tanòe bàu ma cadròt, jaq mangai leq magai meh tàng bàu aih òìq cali calo ka bàu aih pi òùh capoch ka rađeh tàng hò m;

²⁰ majah qmang aih wì haq ùh nui tàng bàu kô: “Yac ka òe ngè rìh loq tadroq, tàng thia ten ka wang kô dìq ep yòc hmo ðàp ðac ka cachit”.

²¹ Ta wang jò aih hnoq ramòt joq qnàng, jaq Môise loh qmòe ka doe: “Au crè joq qnàng, loh dõng ka tarit”.

²² Mahaq oh daq khoe trùh haten ka Wang Si-ôn, ten ka plài da Boc Plình rìh halình, aih la Jérusalem oe ta plình, haten ka nòe bình plình loe ka jàt muàn tagop ti dabau,

²³ haten ka Tagop Hadròeh da bài kon ramua ma khoe jah achìh yiniq ta plình, haten ka Boc Plình, aih cwan hadrah da rìm ngai, haten mahua yiang da bài mangai lem taq atoq,

²⁴ ten ka Chuaq Jesus, aih Mangai taqne da tajao maneo, haten ka mahim ma khoe pùc qnoh, mahim aih lem yeo hnau ka mahim da Abên.

²⁵ Oh daq ep rabiaq haq oq! apaq tàih ðac bàu Mangai ma qnang anoe ka ðadeh; tàng joq bài wì tau tablêq hlài ka bàu Mangai ma anoe bàu pariaq ta crõng taneh, aih dìq khoe ùh claih, loq ka bèn, tàng joq bèn rahen ka Mangai anoe bàu enh plình, aih èh kiang ma ùh claih.

²⁶ Jò aih nèh bàu Haq aih ralàng dìq ka crõng taneh, yàng manòeq kô hòh haq doe: “Oe mòeq yàng hòh, ùh xài au broq ka ralàng toq ta taneh, mahaq ralàng hloe xam ta trõc”.

²⁷ Manòeq kô, bàu ma doe: “Oe tam mòeq yàng hòh” aih la rameh: bài yiniq ma loq dalàc, aih la bài yiniq ma khoe jah broq loh, aih èh ep doeh ðac, ðòeq toq bài yiniq ma ùh hiaq dalàc jah oe hlài.

²⁸ Qmang aih, pang jò bèn ma khoe jah waq Diac ma ùh dalac, bèn khòh manè apôi dôi i manoh loq iu yùq hu patih ka Boc Plinh òòeq jah lem ka manoh haq.

²⁹ majah qmang aih Boc Plinh bèn aih ùnh loq ti bũh cheo.

13

Bàu pariaq pulùch

¹ Ep i manoh loq waq yôt ka dabau tiah ka oh daq.

² Apa q hêt ka biac ðih tamoe, i ngai broq biac aih, mahaq ùh qnì raðeh khoe jah ðih bình plinh.

³ Ep hmàng trũh ka oh daq wì ma qnang rùp clêh, tiah cla bèn hadai qnang wiang chiùq clêh clang ti wì haq, hadai ep hmàng trũh bài mangai ma qnang oe ðeh ta kan baxa, majah qmang aih chac bèn hadai tiah ka chac da wì.

⁴ Rìm ngai ep loq ta-iu trong ổng mai, ta aniang ổng mai ùh jah i kan ùh sròeh, majah qmang aih Boc Plinh tah hadrah ka mangai taqnung xam mangai tango.

⁵ Apa q daiq ka bac jènh, drah lem bùi ka bài yiniq ðeh ma qnang i, majah qmang aih cla Boc Plinh khoe doe:

“Au ùh talah ka kon, au ùh caðac kon”.

⁶ Aih èh bèn jah cajap manoh lùì, hu doe:

“Chuaq wiang ti au, au ùh yùq cleq.

Kon mangai qnhòng kô broq cleq ka au jah?”

⁷ Ep hmàng trũh mangai ma ajèn qnung raðeh, khoe hnài ka raðeh trong Boc Plinh, boq ngan jò pulùch qnhòng da wì haq rih, òòeq tiaq dua manoh lùì da wì haq.

⁸ Chuaq Jesus Christ hì nèh, hì kô, trùh hloe tabla èh dua ùh tablòq.

⁹ Oh daq apaq dôq bài bàu hnài lìq làn qnoeq padô rađeh; manoh loq canòm ka kan tabàih dech òòeq jah cajap aih lem, ùh xài canòm ka dahwèq acaq, aih bài yiniq ùh i jah taq atam cleq ka mangai broq qmang aih. Bèn i mòi eq toq cabõng tadreo, bài mangai patìh ta hnim ranòh kùh waiq ùh khòh yòc cleq enh aih hu acaq.

¹¹ Mangai pajàu haqnèq yòc mahim da nèg tadreo wê mùt tanòe òòq jaq hadròeh òòeq broq ramèn hadreo baxon yiniq lui, yàng chac haq aih bùh enh gùng ka traiq lìn.

¹² Chuaq Jesus hadai chiùq xalep enh gùng ka plài òòeq yòc deh mahim hu broq ka mangai jah hadròeh.

¹³ Bèn ep loh enh gùng ka traiq lìn, òòeq lam trùh ta haq, òòeq hu wiàng chiùq pajùm kan camaih.

¹⁴ Majah qmang aih ta crõng taneh kô, bèn ùh i ka plài ma cajap yòt mòi eq òòe, mahaq bèn chaq plài ma padon trùh kô èh.

¹⁵ Qmang aih drah canòm ka Chuaq Jesus òòeq hu dèch yòt ramèn hadreo xam bàu manè apôi ka Boc Plìn, aih la caqmon riàng da hacùng bàu khoe anoe qnoh yiniq haq.

¹⁶ Paq hèt ka broq trong lem rai loq ti tabàih axong ka wì qnoeq òòq, majah qmang aih, bài ramèn qmang aih lem ka manoh Boc Plìn.

¹⁷ Ep loq iu bàu mangai qnung ajèn oh daq hadai ep enh qneq ka cwàng wì haq, majah qmang aih wì haq riu ka mahua yiang oh daq, wì haq mangai ma ep anoe hlài biác da pì oh daq

ka Chuaq, ðòeq wì lem bùi ðeh ka patìh, ùh hìaq i cleq ep mangò, majah qmang aih trong aih ùh lòeq cleq ka oh daq.

¹⁸ Waiq khàn am ka nhèn diq, majah qmang aih nhèn loq manoh cliac nhèn kô lem enh acaq oe hnhuh jang rìm trong.

¹⁹ Au cali calo ka oh daq waiq khàn beq, dôq au rênh jah trùh ti oh daq.

²⁰ Waiq Boc Plinh catèm, aih la Mangai taiq mahim tajao mòeq ðòe khoe broq ka Chuaq Jesus aih Mangai ban trùu kàn jah rìh hlài enh kan cachit,

²¹ ajàng nòe Jesus Christ, Haq broq ka oh daq jah geo ta rìm trong lem, ðòeq broq gêh yiniq haq ma enh, broq loh kan lem manoh haq oe ta taqne bèn, kan ranhòm troq ka hlài ðiq ta haq mòeq ðòe! Amen.

²² Manòeq kô, au pariaq pì oh daq, drah lem bùi ka tiaq bàu hnài kô; au khoe achih palap ka oh daq qmang aih raq.

²³ Au enh pì loq mangai oh daq bèn aih Timôthê khoe jah caqnaih, tàng haq rênh trùh, aih èh ma hi lam hmàih ka oh daq.

²⁴ Au tanap bàu hmàih trùh bài mangai broq craq tagop xam ðiq ðong mangai da Chuaq. Wì oh daq ma oe ta Itali hadai tanap bàu hmàih trùh pì.

²⁵ Waiq kan tabàih dech oe ti pì oh daq rìm ngai.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d